


ant.
Mart. Yehemmel

1978



L

1851



~~0/0~~

~~1/1~~

B. v. H 12.



117 118



11
16

Eine Christliche

Leichpredigte / vber der Leich der
Durchleuchtigen Hochgebornen Fürstin
vnd Fräwen / Fräwen Sidonien gebornen
Hertzogin zu Sachsen / vnd Fürstin zu
Braunschweig vnd Lüneburg / ge-
than zu Freibergk in der
Thumkirchen.

*Georg-Augusti Daxelhuber
Schribt zu Braunschweig
am 10. Junij 1675*

Durch M. Martinum Schemel
Predigern zu Weissenfels etc.



Gedruckt zu Wittenberg / durch
Johan. Schwertel.
1 5 7 5.

[Faint, illegible handwritten text]



78 L 1851

AV

L 1748



Dem Durchlauch-
tigsten vnd Hochgebornen Fürsten
vnd Herrn / Herrn Augusto Herzogen zu
Sachsen / des heiligen Römischen Reichs / Erzmars-
schalh vnd Churfürsten / Landgrauen in Düringen/
Marggrauen zu Meissen / vnd Burggrauen zu Mag-
deburg meinem gnedigsten Herrn / Wündsche ich
M. Martinus Schemel Prediger zu Weiffen-
fels ein fröhliches / friedliches / glückseliges
Newes Jar / vnd alle zeitliche vnd
ewige Wolfart.



Durchlauchtigster /
Hochgeborner Churfürst
Gnedigster Herr / Ich bin
von vielen Gutherzigen
Christen angelanget vnd
gebeten worden / das ich
die Leichpredigte / So ich
zu ehren E. Churfürst-
lichen G. Hochlöbli-
cher vnd seliger gedechtnis Frawen Schwe-
ster / der Durchlauchtigen Hochgebornen Für-
stin vnd Frawen / Frawen Sidonien gebor-
nen Herzogin zu Sachsen / Herzogin zu
Braunschweig vnd Lüneburg / zu Freiberg
A ij bey

bey irer F. G. Begrebnis gethan / wolte in
druck geben / Vnd wiewol ich mich hierzu vn-
würdig erkenne / Jedoch weil des anlangens
vnd bittens viel / habe ich mich endlichen bere-
den / vnd dieselbige öffentlich drucken lassen /
Erstlich auff das jederman wüste / wie E. Chur-
fürstlichen G. Hochgedachte Frau Schwester
selige nach irem viel erlittenem Creutz vnd
Trübsal / so ire F. G. allhie in dieser betrübten
Welt ausstehen müssen / mit fried vnd freud
gantz seliglichen in dem H. Erri Christo ent-
schlafen / vnd zu rechter ruhe vnd ewigem friede
durch iren Erlöser Ihesum Christum / auff den
sie allein ire hoffnung vnd trost gestellt / gebracht
sey.

Im andern / das E. Churf. G. sich vber
solchem Christlichen vnd seligen Abschied irer
Frauen Schwester herzlich trösten können /
Habe derhalben nicht wissen zu vnterlassen / die-
se meine geringe doch wolmeinende Christliche
predigte E. Churf. G. zu dediciren / vnd bitte
vnterthenigst / E. Chur. G. wollen ir solche mei-
ne wolmeinung gnedigst gefallen lassen. Hie-
mit thue ich E. Churfürstliche G. sampt der-
selben geliebten Gemahl / Jungen Herrschafft
vnd

vnd Frewlin / dem trewen Gott vnd Vater
vnser^s H E R R N Ihesu Christi in seinen
Allmechtigsten schutz befehlen / Datum Weis-
sensfels etc. Anno 1575.

E. Churf. G.
vnterthenigster Diener

M. Martinus Schemel
Prediger zu Weissensfels etc.

Gnade



Gnade vnd friede
von Gott dem Vater / von Gott
dem Son / vnd von Gott dem heiligen
Geist / AMEN.

Andechtigen geliebten in Chri-
sto / Wir haben ihund nach Christlichem
wolher gebrachten gebrauch / die Leich
der Durchlaichtigen vnd Hochgebors-
nen Fürstin vnd Frawen / Frawen Si-
donia / geborne Herzogin zu Sachsen/
Herzogin zu Braunschweig vnd Lüneburg / vnserer
Gnedigen lieben Fürstin vnd Frawen / welche der barm-
herzige gütige Gott vnd Vater / den 4. Januarij zu
abend vmb 6. hora / aus dieser arglistigen vnd verflerten
Welt / vnd betrübtem jammerthal zu sich in jene fröliche/
friedliche / selige / ewige Welt / vnd jmer werende freude
durch den zeitlichen Tod abgefördert / hieher an diesen
Ort / des Fürstlichen Begrebnis vnterthemiglich / erbar-
lich vnd Christlich beleiter / da jr S. G. Leib mit jres
Herrn Vatern Frawen Mutter / Herrn Brüdern vñ viel
andern jrer S. G. Blutsuervandten / jungen Herrlin
vnd Frewlin Leiben / in jren Greblin vnd Serglein / als
einem sanfften Bettlein ausruhen / vnd die erscheinung
des grossen Gottes / vnd vnfers Heilandes Ihesu Chri-
sti / an den jr S. G. bis ans ende bestendiglich geglaubt/
welche numehr Gott lob fur der thür / vnd nicht lange
aussen bleiben kan / erwarten / vnd in der aufferstehung die-
ses Fleisches aus dem staub der Erden / mit verflerten herr-
lichen /

lichen/Durchleuchtenden/Fürstlichen leiben herfur gehen
werden / dem HErrn entgegen gezuht in den Wolcken/
bey im zu sein in ewiger Seligkeit/ Vnd weil es denn bil-
lich vnd Christlichen ist / das wir allhier versamlet / jr F.
G. das geleite zu irem Schlafftummerlein gegeben / wie
wir vns denn allesampt in vnterthenigkeit zu thun schül-
dig erkennen/ auch der Christliche gebrauch erfordert/eine
Leichpredigte in solcher Christlichen versammlung zuthun/
welche mir Vnwürdigen jr F. G. Beichtuater auffge-
tragen worden / so wil ich im namen der heiligen Drey-
faltigkeit solches gerne thun/Damit aber solchs vns allen
mit einander zur Lere vnd trost gereichen möge/so wollen
wir den Vater aller gnaden vmb seinen h. ligen Geist an-
ruffen/vnd mit andacht be. en ein herzlich Vater vnser etc.

Iob. XIX. Cap.

Ich weis das mein Erlöser lebet / vnd er
wird mich hernach aus der Erden auff-
erwecken / Vnd werde darnach mit dieser
meiner Haut vmbgeben werden/vnd werde in
meinem fleisch Gott sehen / denselben werde ich
mir sehen/vnd meine augen werden in schawen
vnd kein Frembder etc.

Geliebten im HErrn / der furnemeste ge-
wisseste vnd frefftigste trost / welchen wir Mens-
schen in vnser höchsten trawrigkeit / vnd im grös-
sten elend dieses zeitlichen lebens haben können / ist der/
welchen wir schepffen aus der aufferstehung der Todten
am Jüngsten tage / an welchen der Son Gottes / der
HERR vnd vberwinder des Todes/mit seiner selbs ei-
genen

genen Stim / Johan. 5. vnd mit der Posaun des Er-
Engels 1. Thess. 4. 1. Corint. 15. das ganze Menschli-
che geschlecht aus dem Staube der Erden / von den Tod-
ten auffwecken / vnd von den augen seiner gleubigen / als
le threnen abwischen Apoca. 21. Esa. 25. vnd all jr leid
in Freude / ire Traurigkeit in wonne verwandeln / vnd die
so durch den Tod geschieden / sich zu sehen / zubesprechen /
vnd bey einander zu leben / herzlich begeren / wider zusam-
men bringen / vnd den Ehemennern ire Ehe weiber / den
Ehe weibern ire Mennner / den Eltern ire Kinder / den Kin-
dern ire Eltern / den Schwestern ire Brüder / vnd einem
jeden seine Freunde / darbey er zu sein von hertzen wünd-
schet / wider geben wird / vñ eine solche gesellschaft / welche
in ewigkeit nicht zutrennen ist / zusammen bringen. Keinen
lieblichen / bessern vnd angenehern Trost können wir ar-
me sündhafftige Menschen / allhie auff diesem betrübten
zeren vnd jamerthal haben / den dieser ist. Denn wenn wir
in vnserm größten elende / betrübnis / traurigkeit vnd hert-
zen angst vns furstellen / allen trost / welcher in der weisen
Heiden Büchern erzelet / vnd in der heiligen Schrift
vermeldet wird / so ist doch kein Trost / der das hert also
rüret / vnd so krefftig vnd lebendig hinein gehet / als eben
dieser einiger von aufferstehung der Todten.

D Jhesus angenehmen vnd krefftigen Trostes / wird
vns nu ein herrlich schön Exempel furgestellt an dem
fromen / gerechten / vnd Gottseligen Manne dem lieben
Job / Denn nach dem er von Gott dem Allmechtigen mit
vielen straffen heimgesucht / von seinem Weibe verspot-
tet / vnd von seinen Freunden hart geplagt ward / auff das
sie im sein gutes Gewissen ihre machten / vnd in verzwei-
uelung brechten / So thut er allhie als ein Christlicher
Gottseliger Man ein öffentliche Confession oder bekent-
nis

nis seines Christlichen glaubens / worauff sein Herz in
seinem grossen vnd schweren Creuz bestehe / vnd beruhe/
vnd wes er sich getröste / Nemblichen des zukünfftigen Er-
lösers vnd Seligmachers / durch welchen er bekomme ver-
gebung der Sünden / aufferstehung des Fleisches / vnd das
ewige Leben. Dieweil er aber seines Glaubens gewis ist /
so wüandschet er von grund seines Herzens / das solche sei-
ne Confession vnd Bekentnis in bley geschrieben vnd ges-
gossen / oder in Marmelstein gehawen möchte werden.
Vnd weil die aufferstehung des Sons Gottes / vnd aller
lieben gleubigen auff's kürzest / sehr lieblich vnd tröstlich
hierinne verfasset ist / So hat dieser Spruch der Christli-
chen Kirchen so wol gefallen / das sie in vnter die Christli-
che Grabgesenge oder Responsoria verordnet / welcher
noch heutiges tages den lieben Christen zu trost gesungen
wird / Wenn wir vnser Mitbrüder vnd Mitschwester / so
in Christo entschlaffen sein / in jr ruhe Kemmerlein beleis-
ten. Weil denn nu dieser herrliche Spruch vor andern
so hoch wird angezogen / So wollen wir denselbigen
auch auff dis mal vns zur seligen Lere vnd trost / bey die-
ser Fürstlichen Leich kürzlichen erklären / vnd dabey diese
zwey punct handlen. Nemblichen / Wes sich der liebe Job
in seinem grossen Creuz vnd elend getröset / welches vns
eine feine Lere geben wird / wes wir vns in vnserm
Creuz / leiden vnd Todes nöten / auch furnemblichen trös-
ten vnd erinnern sollen. Zum andern wollen wir von
der in Christo entschlaffenen Fürstin Christlichen leben
vnd sterben sagen / Der Barmhertzige Gott vnd Vater
vnser HErrn Ihesu Christi gebe vns darzu seine gnas-
de vnd heiligen Geist / Amen.

Ich höret lieben Christen vnd Freunde / nach dem

B

der

Der frome/gerechte/ gedultige vnd Gottselige Man Job/
in seiner eussersten not vnd beschwerung/vom Teufel vnd
seinem Werkzeug/ mit gar hönischen/ bittern/ giftigen/
Sarcasms wurde angegriffen / als müste er nu in seinem
jammer/Creuz vnd elend zu boden gehen / vnd von Gott
ewig verstoßen sein vnd bleiben: So lest er sich doch
nichts erschrecken noch anfechten / Sondern wehret sich
Nitterlich wider den giftigen vnd boshafftigen feind den
Teufel / wirfft im getrost entgegen seinen glauben vnd
hoffnung/damit er also des Teufels giftige pfeil vnd an-
lauffen zu rücke schlage vnd zu nicht mache.

Er tröstet sich aber in solchem seinen Glauben
vnd Bekenntnis / furnemlichen zweier Artickel vnsers
Christlichen glaubens. Denn das er erstlichen saget/
Ich weis das mein Erlöser lebet etc. darin tröstet
er sich des andern Artickels vnsers Christlichen glaubens/
Nemlichen / das Ihesus Christus / warer Gott vnd
Mensch/ Gottes vnd Marien Son/ sey sein Erlöser/der
auch vmb seiner Sünde willen sol sterben vnd begraben
werden/ vnd vmb seiner Gerechtigkeit willen wider auff-
erstehen / welches er hiemit bekennet / da er spricht / Ich
weis/als wolt er sagen / wolan / ob ich gleich hart geplas-
get vnd beschweret werde / mus auch bekennen/das ich ein
armer schwerer Sünder bin/vnd hab mit solchen meinen
Sünden / diese / ja viel ein grössere straffe verdienet/So
weis vnd gleube ich doch auffss aller gewissste / vnd von
grund meines Herzens / das der Son Gottes Ihesus
Christus sey mein Erlöser/ das ist/ das er von anfang bey
seinem Himlischen Vater vor mich gebeten/ werde auch
Leib vnd Seel vmb das ende der Welt an sich nemen/
vnd

Vnd als das rechte Osterlambdin / vmb den Abend geschlachtet werden / für meine Sünde sterben / sein Blut vergiessen / vnd begraben werden / Aber dieweil er ist der lebendige Son Gottes / ja das leben selbst / Johan. 14. welcher das natürliche Leben allen andern Creaturen / vnd auch das freudenreiche ewige Leben allen heiligen Engeln vnd Menschen gibt vnd erhelt / so wird er im Grabe vnd Tode nicht bleiben / vnd sein Fleisch die verwesung nicht sehen / Psal. 16. Sondern weil er ist der ewige / lebendige Son Gottes / gleiches wesens / willens / krafft / Maieestet vnd Herrligkeit / mit Gott dem ewigen Vater / vnd mit Gott dem ewigen heiligen Geist / So wird er der alten giftigen Schlangen den Kopff zutreten / Genes. 3. dem boshafftigen feind dem Teufel sein Reich zustören 1. Johan. 3. im seine Gewalt nemen / dem Tod sein Stachel zerbrechen / im Sieg verschlingen Dse. 13. 1. Corin. 15. Das Raubschlos die Helle zerschleiffen / am dritten tage von den Todten widerumb aufferstehen / das Hefengnis gefangen führen / Colos. 2. Ephes. 4. vnd durch solchen seinen gehorsam / leiden / sterben / vnd aufferstehung erlangen vnd austheilen / vergebung der Sünden / versünnung mit Gott / erlösung aus dem Tode / Gerechtigkeit / ewiges Leben / vnd die ewige Seligkeit / allen Menschen / so an in glauben / vnd sich seines Verdiensts von herzen freuen / vnd trösten / men solches in einem warhafftigen Glauben zueignen / vnd in solchem glauben von dieser Welt abscheiden.

Wie sich nu der liebe Job in seinem höchsten Creuz vnd elend des zukünftigen Erlösers von herzen gefrewet vnd getröstet hat / all sein trost / hoffnung vnd zuuersicht /

B ij

in allen

in allen anfechtungen vnd nöten auff in allein gesetzt/ vnd
damit alle anfechtung überwunden: Also sollen wir auch
thun/ in allem jamer vnd elend dieses zeitlichen vnd ver-
genglichen Lebens / ja an vnserm letzten Ende/ wenn vn-
sere grosse blutrote Sünde durch den donner des Gese-
zes lebendig wird/wenn vns der zorn Gottes/welcher ist
ein verzerendes feuer / für welchen Berg vnd Thal zur-
schmelzen / Amos 3. so heis in vnser Herr scheineth/
das vns das Gesicht vnd Gehör darüber vergehet/ Wenn
vns der fluch des Gesezes beschuldiget / wenn vns der
hellische Stockmeister vnd Hencker anlaget/ wenn vns
der bittere Tod einiger not erwürgen wil / wenn die
Helle iren feurigen Rachen auffsperrt/ vnd wil vns ver-
schlingen/ Wenn vnser eigen fleisch vnd blut mit solchen
gedancken vns ansicht vnd erschreckt / vnd wil vns be-
reden / Gott sey vns feind / wolle vnser gar keine gnade
haben/ er habe sein Andlig verborgen/ vnd vergessen gne-
dig zu sein / seine Güte sey für zorn verschlossen / das er
vns nicht helffen noch erretten wolle/ ja es sey nu gar aus
mit vns / wir sind von Gott verlassen / wir müssen in
Tode vnd Grabe ewiglich bleiben vnd verderben / vnd
sey aus dem Tode keine Erlösung.

So sollen wir vns erstlich mit dem lieben Job/
dieses andern Artickels vnser Christlichen glaubens von
herten freuen vnd trösten / das Ihesus Christus Gottes
vnd Marien Son vnser Erlöser lebe / vnd habe vns mit
seinem heiligen thewren Rosinfarben Blut / vnd mit
seinem unschuldigen Leiden vnd Sterben / von Sünde/
Tod/ Teufel/ Hell/vnd von dem Fluch des Gesezes er-
rettet/vnd das ganze werck der Erlösung ausgericht/das
wir

wir nu vmb seiner willen haben einen gnedigen Gott vnd
Vater / vergebung der Sünden / die Gerechtigkeit die für
Gott gilt vnd bestehet / den heiligen Geist / vnschuld / ewi-
ges Leben vnd die ewige Seligkeit / vnd das nu keine ver-
damnis mehr ist an allen denen / die in Christo Ihesu
sind / das ist / die sich seines Verdiensts / Leidens vnd ster-
bens von hertzen freuen vnd trösten / Rom. 8.

Sollen derwegen mit frölichem hertzen singen
vnd sagen mit dem lieben Propheten Osea / vnd dem heil-
ligen Apostel S. Paulo: Der Tod ist verschlungen in
dem Sieg. Tod / wo ist dein Stachel? Hell / wo ist dein
Sieg? Aber der stachel des Todes ist die Sünde / die
krafft aber der Sünde ist das Geseze. Gott aber sey danck
der vns Sieg gibt / durch vnsern Herrn Ihesum Chri-
stum / Ose. 13. 1. Corinth. 15.

Es ist aber mit besonderm vleis allhie zu mercken
das glaubens Wörtlin / das da heisset MEVS / Denn
der liebe Job saget nicht / Ich weis das vnser Erlöser le-
bet / Sondern ich weis das Mein Erlöser lebet / Damit er
anzeigt / das ein jeder für seine Person / vnd für sich selbst
dieses Erlösers annehmen / auff in trawen vnd bawen / all
sein trost / hoffnung vnd zuversicht / auff in alleine setzen
sol vnd mus / vnd von grund seines Hertzen glauben / das
er nicht allein anderer / sondern auch sein vnd mein Er-
löser vnd Seligmacher sey / der dich vnd mich von deinen
vnd meinen Sünden / vnd von der straff so darauff ge-
höret / errettet vnd erlöset hat.

Daher sagt der Prophet Abacuc am 1. Capit. Der
Gerechte wird seines glaubens leben. Darumb so hat der
Son Gottes gestift / geordnet / vnd eingesetzt die Hoch-

würdigen Sacrament als eusserliche Zeichen / das ein jeder dadurch versichert werde / das das verdienst Christi auch in angehöre / vnd das es auch im zu gut geschehen sey / vnd das Er es selbst auff sich zihet vnd deute / nemlich / das er gewis glaube / vnd es warhafftig dafur halte / vnd sich hiemit tröste / So war er in seiner jugend getaufft / so war sey er auch von Gott dem Vater zu seinem Kinde vnd Erben / ja zum Miterben Ihesu Christi an vnd aufgenommen / so war er in seiner Tauffe mit dem wasser im namen der heiligen Dreyfaltigkeit begossen / so war sey er auch mit dem Blut Ihesu Christi besprenget / vnd von allen seinen Sünden gewaschen. Item in der Absolution / So war im von einem ordentlichen diener Gottes die Absolution vnd vergebung der Sünden gesprochen / so war sollen im auch alle seine Sünde vergeben vnd verziehen sein / vnd derselben in ewigkeit nicht mehr gedacht werden / Item / so war im vnter dem Brot vnd Wein / der ware wesentliche Leib / vnd das ware wesentliche Blut vnseres HERRN Ihesu Christi gegeben vnd ausgeteilet wird / so war werde er auch versichert / das sein Leib vnd Seel zum ewigen Leben sol bewaret werden. Sehet also meine geliebten im HERRN / sollen wir vns in allem vnserm Creutz vnd elend / sonderlich aber an vnserm letzten ende / wenn wir mit dem Tode ringen / wenn vns der kalte angstschweiß ausbricht / dieses andern Artickels von der Erlösung des Sons Gottes / von seinem Verdienst / Leiden sterben vnd frölichen aufferstehung von herten trösten / vnd vns denselbigen zu nutz vnd eigen machen / So viel von diesem Artickel.

Im andern / tröset sich auch der liebe Job des dritten Artickels vnseres Christlichen glaubens / da wir
also

also bekennen vnd sagen / Ich glaube eine aufferstehung
des fleisches vnd ein ewiges Leben / vnd spricht also / Vnd
er wird mich hernach aus der Erden aufferwecken / vnd
ich werde mit dieser meiner Haut vmbgeben werden. Das
mit er so viel wil anzeigen. Wolan / ob es gleich ein mal
mus gescheiden vnd gestorben sein / vnd ob mein fleisch
verschwindet / vnd zu staub vnd asschen wird: Dennoch
bin ich des gewis / vnd das ist mein trost / das ich im Gra-
be vnd Tode nicht ewiglich bleibe / vnd zu grund vnd bo-
dem gehen werde / Sondern weil mein lieber Herr vnd
Heiland Ihesus Christus die bande des Todes zerrissen /
die Helle zerstöret / lebet / herrschet vnd regieret ewiglich /
so wird vnd mus dieser mein nichtiger Leib aus dem stau-
be der Erden erwecket / vnd zur ewigen Herrligkeit erho-
ben werden / Denn weil vnser heubt Christus der Erst-
ling vnd Erstgeborne hindurch ist / Mich. 2. lebet / herr-
schet vnd regieret ewiglich / stirbet nicht mehr / der Tod
herrschet auch hinfort nicht mehr vber in / Rom. 5. denn
das er gestorben ist / ist er der Sünden ein mal gestorben /
Nu aber lebet er Gott / vnd ist im alle gewalt im Himmel
vnd auff Erden gegeben / Psal. 8. Matth. 28. So mus
folgen / das auch wir / so an in glauben / als glieder seines
Leibes / mit im vom Tode zum Leben allbereit sind hins-
durch gedrungen / vnd das vnser Leibe durch krafft sei-
ner aufferstehung am Jüngsten tage aus dem stau-
be der Erden müssen aufferwecket werden.

Das aber dem gewis also sey / das alle Menschen
die fur vns gelebet / die wir jzt leben / vnd nach vns künfft-
ig leben vnd sterben / werden warhafftig am Jüngsten ta-
ge aus dem stau-
be der Erden aufferwecket vnd herfur
gehen /

gehen / vnd das die so der Jüngste tag lebendig erhaschet /
im augenblick sollen vorwandelt werden / des haben wir
viel mehr klare zeugnis / vnd Exempel der heiligen
Schrift im alten vnd neuen Testament / welche wir kürz
lich nach einander ansehen wollen.

I. Erstlich bezeuget solches das alte Testament /
Esa. 26. Deine Todten werden leben / vnd mit dem Leich-
nam aufferstehen / wachet auff vnd rühmet / die jr liget vn-
ter der Erden / denn dein thaw ist ein thaw des grünen Fel-
des / aber das Land der Todten wirstu stürzen / gehe hin
mein Volk in eine Kammer / vnd schleus die Thür hin-
der dir zu / verbirge dich ein klein augenblick / bis der zorn
fur vber gehe. Denn sihe / der HERR wird ausgehen /
von seinem ort / heim zu suchen die Einwohner des Landes
vber sie / das das Land wird offenbaren ir Blut / vnd nicht
weiter verhelen / die drinnen erwürget sind / Es gehöret
auch hieher der feine Spruch Esa. 25. Das Gott zu der
zeit werde abwischen die threnen von aller angesichte / vnd
werde auffheben die schmach seines Volcks / welches sein
tröstlich ist / denn frome Christen müssen in dieser Wele
das Creuz tragen / vnd gar viel threnen Brot essen / wie
es der 80. Psalm nennet / vnd gehet den Christen in dies-
sem leben / gleich wie fromen Kindern / die vnter böse Buz-
ben komen / vnd von denselbigen gestossen / geschlagen vnd
beleidiget werden / darüber sie denn / mit nassen Augen /
zum Vater vnd Mutter komen gelauffen / vnd die Mut-
ter das Wischtüchlin nimet / wischet dem Kinde seine
threnlin ab / vnd spricht / sey zu frieden mein liebes Kind /
was gilts die bösen Buben sollen redlich bezalt werden.
Also lauffen frome Christen alle tage durch jr Gebet / mit
nassen

nassen Augen vnd herken fur Gott irem Himlischen
Vater. Ob es nu wol scheint / als wolte der Vater wi-
der die bösen Buben nicht helffen / vnd lest sie iren mut-
willen an den fromen vben / so wirds doch endlich erfüllet
werden / was gilts / das es vngestraft an inen nicht blei-
ben wird. Er aber / Gott der **HEXX** wird die threnen
von aller Angesicht abwischen / vnd die schmach seines
Volcks auffheben / Daran zweiuelt nicht / sagt der Pro-
phet / denn er hats gesaget / Er ist der dixit Dominus.
Ein schön herrlich zeugnis haben wir im Propheten
Ezech. 37. Cap. durchaus / Des **HErrn** hand kam vber
mich vnd füret mich hinaus im Geist des **HErrn** / vnd
stellet mich auff ein weit Feld / das voller beine lag / vnd er
füret mich allenthalben dadurch / vnd sihe des Gebeins
lag viel auff dem Felde / vnd sihe / sie waren sehr verdor-
ret. Vnd er sprach zu mir / Du Menschenkind / meinstu
auch das diese Gebeine wider lebendig werden / vnd ich
sprach / **HEXX HErr** / das weistu wol / vnd er sprach zu
mir / weissage von diesen beinen / vnd sprich zu inen / Ir
verdorreten beine / höret des **HErrn** wort / so spricht der
HErr. Sihe / ich wil einen odem in euch bringen / das ir
solt lebendig werden / ich wil euch odem geben / vnd fleisch
lassen vber euch wachsen / vnd mit Haut vberziehen / vnd
wil euch odem geben / das ir wider lebendig werdet / vnd
solt erfahren / das ich der **HEXX** bin / vnd ich weissagete /
wie mir befohlen war / vnd sihe / Es rausschete wie ich
weissagete / Vnd sihe / es regete sich / vnd die Gebeine ka-
men wider zu samen / ein iglichs zu seinem Gebeine / vnd
ich sahe / vnd sihe / es wuchsen adern vnd fleisch drauff /
vnd er vberzog sie mit Haut / Es war aber noch kein odem
in inen / vnd er sprach zu mir / weissage / Du Menschen-
kind / vnd sprich zu den winden / So spricht der **HErr**
E **HEXX**

HERR / Wind kome herzu aus den vier winden / vñ blas
se diese Todten an / das sie wider lebendig werden. Vnd
ich weissagete wie er mir befohlen hatte / da kam odem in
sie / vnd sie wurden wider lebendig / vnd richteten sich auff
ire füsse / vnd ir war ein sehr grosses Heer. Sihe / das ist
gar ein herrlich zeugnis der aufferstehung der Todten.
Leset auch im Propheten Daniel 12. Cap. Viel so vnter
der Erden schlaffen / ligen / werden anffwachen / etliche
zum ewigen Leben / etliche zur ewigen schmach vnd schan-
be. Job 19. Ich weis das mein Erlöser lebet / vnd er wird
mich hernach aus der Erden aufferwecken / vnd werde dar-
nach mit dieser meiner Haut vmbgeben werden / vnd wer-
de in meinem fleisch Gott sehen / denselben werde ich mir
sehen / vnd meine Augen werden in schawen vñnd kein
frembder. Psal. 17. Ich Herr wil schawen dein Andlit
in Gerechtigkeit / ich wil sat werden / wenn ich erwache
nach deinem Bilde. Wenn wird das geschehen lieber
Dauid / das du wirst erwachen nach Gottes ebenbild?
Antwort. Das wird geschehen in der frölichen aufferste-
hung / der sollen wir auch mit gedult erwarten / Hieher ge-
hört das ganze 5. Cap. des Buchs der Weisheit / wel-
ches jr alle tage lesen oder euch fur lesen lassen solt / vnd
hebet sich also an: Als denn wird der Gerechte sehen mit
grosser freudigkeit / wider die so in geengstiget haben etc.
11. Im andern bezeuget solches das newe Testa-
ment / Johan. 5. Warlich / warlich ich sage euch / spriche
Christus / Es kompt die stunde vnd ist schon da / das die
Todten werden die stimme des Sons Gottes hören / vnd
die sie hören werden / die werden leben. Johan. 6. Das ist
der wille des / der mich gesand hat / das wer den Son sihet
vnd gleubet an in / habe das ewige Leben / vnd ich werde in
aufferwecken am Jüngsten tage. Johan. 11. Ich bin die
Auff-

Aufferstehung vnd das Leben/ Wer an Mich gleubet/ der wird leben / ob er gleich stürbe / vnd wer da lebet vnd gleubet an Mich / der wird nimmermehr sterben. Matth. 25. Wenn aber des Menschen Son komen wird / in seiner Herrligkeit/ vnd alle heilige Engel mit im / denn wird er sitzen auff dem Stuel seiner Herrligkeit / vnd werden fur im alle Völcker versamlet werden. 2. Corinth. 5. Wir müssen alle offenbaret werden fur dem Richterstuel Ihesu Christi / auff das ein iglicher empfahe / nach dem er gehandelt hat/ bey leibs leben/ es sey gutes oder böses. 1. Thes. 4. Denn so wir gleuben das Ihesus Christus gestorben vnd aufferstanden ist / also wird Gott auch die da entschlaffen sind durch Ihesum/ mit im führen etc.

III. Zum dritten/ so haben wir auch klare exempel der heiligen schrift/welche Gott der HERR zu jeder zeit der Welt zum waren zeugnis der Aufferstehung hat geben wollen. Der ersten Welt hat er gegeben den Enoch Genes. 5. welchen Gott lebendig mit Leib vnd Seel gen Himmel nam / vnd solches darumb / das die fromen Leute in irem betrübnis aus solchem exēpel gewissen trost hetten / ob sie sich gleich in der Welt leiden müssen/ idermans Fußshad-der sein/manche tieffe pfütze austretten/ So hette sie doch Gott hiemit versichert / das sie ein ander ewig Leben haben sollen/ darin sie wider getröstet werden/in welches Leben er den fromen Enoch von inen auffgenommen hatte.

Eliam der in der mittel Welt gelebet / hat Gott der HERR auch also lebendig / mit Leib vnd Seel zum zeugnis eines andern Lebens / auff einem fewrigen Wagen gen Himmel gefüret/ 2. Reg. 2. welcher hernach auff den Berg Thabor/von wichtigen sachen mit dem HERN Ihesu Christo geredet/Matth. 17. Es hat auch der Prophet Elias der Widwen Son zu Sarepta vom Tode

aufferwecket / 1. Reg. 17. welcher hernachmals der Kin-
chen Gottes on allen zweivel wüßlich wird gedienet ha-
ben / Also erwecket auch der Prophet Eliseus / seiner Wit-
tin der Sunamitin Sönlin vom Tod auff / welches der
Prophet Jonas sol gewesen sein / 2. Reg. 4. Vnd da der
Prophet Elisa schon tod war / vnd ein todter Man in sein
Grab geworffen war / vnd die gebeine Elisa anrürete /
ward er lebendig / 2. Reg. 13. Wiewol aber kein zweivel
ist / das Christus der Son Gottes / viel Menschen vom
Tode habe aufferwecket / so haben doch die Euangelisten
nur drey exēpel beschrieben / nicht on sonderliche geheimnis
dabey zu mercken / das gleich wie im altē Testament / ir drey
von den Todten erwecket / wie gemeldet worden / auch also
drey im newen Testament / beschrieben sind / damit anzu-
zeigen / das nach volendung 6000. Jar die allgemeine
aufferstehung der todten geschehen sol. Das 1. exēpel wird
beschrieben Luce 7. von der Widwen zu Naim einigem
Son / welchen der HErr Christus nur mit einem einigen
Wort / als vom schlaff aufferwecket hat / Das 2. exempel
ist / von Jairi des obersten der Schulen Töchterlin / Matth.
9. Das 3. exempel ist / vom Lazaro zu Bethania Joh. 11.
welchen der HErr Christus Ihesus / da er vier tage im
Grabe gelegen vnd angefangen zu stincken vnd zu faulen /
auch mit einem einigen Wörlein erwecket hat. Das aller
Herrlichste Exempel aber vnser aller aufferstehung / ist
vns furgestellt in der frölichen vnd heilsamen aufferste-
hung vnser HErrn vnd Heilandes Ihesu Christi / wel-
cher am dritten tage ist von den Todten aufferwecket / vnd
hat mit sich erweckt / vnd bey sich gehabt eine Herrliche
versammlung der heiligen Patriarchen vnd anderer seligen /
Matth. 27. die sich bey der ganken versammlung / der Apos-
steln / vierzig tage lang / bis zur Himelfart des Sons
Gottes /

Gottes / haben sehen lassen / vnd haben mit Maria vnd
den Aposteln / vnd mehr denn mit fünff hundert Brüdern
freundlichen sich vnterredet / von vielen wichtigen vnd
grossen sachen. Von dieser herrlichen aufferstehung
des Sons Gottes / saget Paulus 1. Corin. 15. also / Nu
aber ist Christus auffestanden von den Todten / vnd der
Erstling worden / vnter denen die da schlaffen / Sintemal
durch einen Menschen der Tod / vnd durch einen Mens-
chen die aufferstehung der Todten kompt / Denn wie sie
in Adam alle sterben / also werden sie in Christo alle le-
bendig gemacht werden. Leset daheim selbs die vorge-
hende / vnd nachfolgende wort / vnd habt achtung drauff /
wie der heilige Apostel S. Paulus die aufferstehung
Christi vnd vnser in ein ander sicht / vnd an einander
hendet / wie vns auch der theure vnd werde Man D. Lu-
ther seliger gedechtnis dahin weist / da er spricht : Vnser
aufferstehung ist allbereit mehr denn die helfft geschehen /
denn weil Christus Ihesus ist das heubt der Christenheit /
vnd wir seine Gliedmassen / vnd aber er auffestanden ist /
so hat er warlich vnser Leibe / als seine glieder / auch allbe-
reit berüret / vnd weil der aus dem Grabe ist / der da heisset
Resurrexit, so mus der / der da saget / Credo / vnd mit
glauben an im hanget / auch hernach.

III. Im vierden / so sind auch vnser Sacrament
eine gewisse anzeigung vnser Aufferstehung / als nemlich
die Tauffe / denn gleich wie dieselbige ist eine bedeu-
tung des Todes vnd Begrebnis Christi / also ist sie auch
ein zeugnis der aufferstehung Ihesu Christi / vnd auch
vnser Geistlichen vnd leiblichen aufferstehung. Also auch
das heilige Abendmal des HERN / Denn also schreibet
der alte Lerer Ireneus : Dieweil vnser Leibe im heiligen
Abendmal / den lebendigen Leib vnd Blut Christi empfa-

hen/essen vnd trincken / so sey es vnmöglich / das vnser
Leibe im Tode bleiben vnd verwesen / Sondern / dieweil
der Leib vnd das Blut Christi leben / vnd die verwesung
nicht sehen / vnd vnser Leibe den Leib vnd Blut Christi
bey vnd in sich haben / Also das er in vns vnd wir in im
sind / so mus auch folgen / das vnser Leibe die ware hoff-
nung der aufferstehung haben / vnd das vnser fleisch nicht
umbkome / dieweil es mit dem Leib Christi genceret vnd er-
halten wird.

V. Im fünfften / so haben wir auch feine zeichen
vnd anweisung / in der Natur / so die Aufferstehung furbil-
den / Denn es ist aus den alten Griechischen vnd Latini-
schen Scribenten klar / das die Gottseligen allezeit an sol-
chen gemelden vnd bedeutungen / lust vnd gefallen gehabt
haben / Ja es hat auch Plato der Heide gesaget / das die
Schwanen / wenn sie iht sterben / nicht aus schmerzen sin-
gen / sondern das sie des künfftigen Lebens freude empfin-
den. Braucht doch der HErr Christus selbs das Gleich-
nis von dem Weizenkörnlin / da er also spricht / Joh. 12.
Warlich ich sage euch / es sey denn das das Weizenkorn
in die Erde falle / vnd ersterbe / so bleibets alleine / Wo es
aber erstirbet / so bringets viel fruchte / vnd auff dis Körn-
lin mag auch gesehen haben der liebe Ignatius / da er fur
die Lewen solte geworffen werden / auff das er von jnen
zurissen würde / vnd saget also: Frumentum Dei sum, &
dentibus Bestiarum commolior, vt mundus panis Chri-
sto meo inueniar, Eusebius, Lib. 3. Cap. 36. das ist / Ich
bin ein Körnlin des HErrn / vnd werde durch der wilden
Thier Beene zermalen / auff das ich meinem HErrn
Ihesu Christo / ein reines Brot werde. Dieser liebe Mer-
terer hat on allen zweivel auff Christi wort gesehen / da er
spricht / Es sey denn etc. Last aber dis eine schöne Feldpos-
tilla

stillta sein / die vns der Son Gottes Ihesus Christus in
ein Körnlin vnd Sahmlin schreibet. Wer es zuvor sein
lebenlang nicht gesehen / wie man see / vnd wie das aus-
geseete wechset / vnd zunimpt / der würde anders nicht den-
cken können / denn es were der Same verloren. Wer es
aber weis / der befihlets dem lieben Gott / frölicher zuuer-
sicht / ob wol der Same den gangen harten gefehrlichen
Winter vnter der Erden ligen mus / wenn es gegen dem
Frühling kompt / werde er sich reichlich wider ereugen /
welchs denn auch geschicht durch krafft des gesprochenen
Worts Gottes des HErrn in der Schöpffung / Das
wort gehet noch heut zu tage in seiner krafft / Wunderbar-
lich ist's auch / doch zum trost wol zu behalten / wenn das
Weizenkörnlin in der Erden pflaget zu keimen / so drin-
gets durch die Erden / vnd stößet ein Klößlin Erden / das
doch eben gros vnd schwer ist / vber sich. Wer gibt im
solche krafft? Gott hat solche krafft in der ersten Schöp-
ffung drein gesprochen / daraus ein fromer Christ also
schliessen kan / Ist die krafft Gottes vnd seines Worts /
noch mechtig in dem Weizenkörnlin / bis in dis sechste
tausende Jar / so wird sie in vns auch nicht verloren sein /
Warumb wollen wir denn an der Auferstehung vnser
fleisches zweimeln? Welches nicht allein in der Schöp-
ffung die vnsterblichkeit bekomen vnd noch behelt / sondern
auch durch das Blut Ihesu Christi / vnd seine Auferste-
hung / solche lebendige krafft empfangen / das es auch zu
seiner zeit die Erden / darunter es ligen / vber sich treiben /
vnd im rechten Lenzen vnuerweslich zum ewigen Leben
herfur gehen / vnd aus diesem natürlichen / schwachen vnd
verweslichem fleische ein newer Himlischer / krefftiger vñ
vnuerweslicher Leib wachsen wird / welcher in einem
Geistlichen vnd Englischen wesen mit Ihesu Christo
ewiglich

ewiglich leben vnd regieren wird / Solche vnd dergleichen Biltis vnserer Auferstehung / gibt vns die Natur viel / welche alle zu erzelen wolte sich zu lang verweilen.

Damit wir aber nu solcher Auferstehung gar gewis sein mögen / vnd solcher herrlicher trost in vnsern herten deste ehe vnd besser hafften vnd fassten möge / So zeigt der liebe Job auch die vmbstende vnd gelegenheit an / wie es mit der Auferstehung der lieben gleubigen / vnd mit dem ewigen Leben zugehen werde / vnd spricht also :
Ich werde mit dieser meiner Haut vmbgeben werden / vnd werde in meinem fleisch Gott sehē.
Damit er deutlich diesen herrliche trost gibt / das die Auferstehung der lieben gleubigen so gewis sey / das ein jeder eben den Leib / das Gebeine vnd Fleisch wird wider bekommen das er gehabt / Ich mein es / du deines. Denn ich / spricht Job / werde eben die Haut so von Würmen durchstochen vnd verzeret wird / wider anzihen / Ich der alte vorrige Job werde in diesem meinem fleisch / das man ins Grab leget / Gott anschawen / ich vnd kein frembder. Solcher vnser Leib aber / der am Jüngsten tage sol auferwecket werden / wird nicht sein ein sündhafftiger / schwacher vnd sterblicher / sondern ein heiliger starcker vnd vnsterblicher Leib / wie solches bezeuget der Apostel S. Paulus / 2. Corinth. 15. Wir werden alle verwandelt werden / vnser natürliche Leib in einen Geistlichen / der irdische in einen Himlischen / der sündhafftige in einen Heiligen / der schwache in einen starcken / der vnehrlliche in einen Herrlichen / der sterbliche in einen vnsterblichen / der verwesliche in einen vnverweslichen vnd ewigen. Denn weil Christus vnser Heubt verkleret ist / vnd in seiner auferstehung einen klarificirten / herrlichen vnd glantzenden Leib hat

Hat an sich genommen/wie Paulus sagt zum Phil. am 3. So
ists unmöglich/das wir seine lebendige Gliedmassen / in
ewiger schmach solten bleiben/sondern wir werden seinem
verklärten Leibe ehnlich vnd gleich sein / Wie Johannes
saget in seiner 1. Epistel am 3. Capit. Wir sind nu Got-
tes kinder/ vnd ist noch nicht erschienen was wir sein wer-
den/Wir wissen aber wenn er erscheinen wird/das wir im
gleich sein werden/denn wir werden in sehen/wie er ist. Ja
wie sein Andlis leuchtet auff dem Berg Thabor/ wie die
helle Sonne/ vnd sein Kleid schnee weis wird/ Matt. 17.
Marc. 9. Luc. 9. Also werden wir auch leuchten vnd glen-
zen wie die Sternen am Himmel/in ewiger Weisheit/Ge-
rechtigkeit/ Herrligkeit/ Ehre/ freude vnd vnsterblichkeit/
dessen wir ons von hertzen freuen vnd trösten / Vnd ob
wol einer grösser klarheit wird haben denn der ander/ wie
ein Stern den andern vbertrifft an der klarheit / dennoch
werden wir alle grosse klarheit haben. Wie hievon gar
herrlich vnd schön redet der liebe Augustinus: Etsi non
omnium eadem gloria, tamen sufficiens erit beatitudo:
Das ist / ob wir gleich nicht alle einerley Herrligkeit ha-
ben werden / so werden wir doch volle gnüge an vnser
Seelen seligkeit haben.

Darnach spricht der liebe Job ferner: Ich werde
in meinem fleisch Gott sehen / denselben werde ich mir se-
hen/vnd meine augen werden in schawen vnd kein ander.
Allhie müisset jr behalten den vnterscheid/Die Gottlosen
werden den Son Gottes auch anschawen / aber allein in
seiner Menschlichen natur/wie geschrieben stehet/Apo. 1.
Sihe/ er kompt in den Wolcken / vnd es werden in sehen
alle augen/ vnd die in gestochen haben/vnd werden heulen

D

alle

alle Geschlecht auff Erden. Zach. 12. Sie werden sehen
in welchen sie gestochen haben. Darnach so werden sie in
sehen/als einen ernstern/gestrenge Richter/ der sie als bald
zum ewigen Hellschen feuer verurteilen wird/ Vnd zu
inen sagen / Gehet hin ir verfluchten in das ewige Helli-
sche feuer/welches dem Teufel vnd allen Gottlosen berei-
tet ist / Matth. 23. Solches vnwiderruffliches Vrteil
wird als bald volzogen werden / das die Gottlosen ewig
von Gott in abgrund der Hellen / in feurigen Pful / der
mit Schwefel vnd Pech ewig brennet / verstorffen sein
müssen/ Da wird/wie der Prophet Esaias am 66. Capit.
saget / ir Barm nicht sterben / vnd ir feuer wird nicht
verlesschen/ vnd werden allem fleisch ein Grewel sein/das
ist/ir gewissen wird sie beschuldigen/ der zorn Gottes vnd
dis ewige verdammnis erschrecken. Da werden sie sein vnd
bleiben müssen in ewiger gemeinschaft der Boshaftigen
Teufeln / welche sie peinigen werden/ vnd müssen on alle
gnade / on alles auffhören / in solcher not bleiben / bren-
nen / vnd ewige pein vnd qual leiden. Da werden sie zet-
ter vnd mordio ober sich schreien/ vnd sagen/ O ir Berge
fallet ober vns / vnd ir Hügel bedecket vns / Sie werden
ire hende ober iren köpffen zusamen schlagen/ vnd sagen/
Ah das wir nicht geboren weren / sie werden ewiglich ster-
ben/ vnd doch nimmermehr sterben können. Ah Gott wie
wird da eine Pein sein / die wir hie nicht können ausges-
chē/dafür der trewe Gott alle frome Christen behüten wol-
le. Also werden die Gottlosen den Son Gottes sehen.

DArgegen aber die gleubigen / werden hören die
liebliche stim des Sons Gottes: Kompt her ir gebenedei-
eten/ererbet das Reich / das euch von anbegin der Welt
bereitet ist / Matt. 25. Vñ werden alda mit iren leiblichen
gesches



geschewerten vnd verflerten augen/iren Heiland vnd Er-
löser sehen/in seiner Göttlichen natur/das ist/in der Ma-
iestet vnd Herrligkeit / die er bey seinem Himlischen Va-
ter gehabt / als der Erstgeborne aller Creaturen/ ehe denn
der Welt grund ist geleget worden/ wie dauon saget Chri-
stus Ihesus/ Johan. 17. Ah Vater / ich wil/das wo ich
bin/ auch die bey mir sein / die du mir gegeben hast. Das
sie meine Herrligkeit sehen/ die du mir gegeben hast. Des-
gleichen werden auch die Gottseligen anschawen seinen
glenkenden Leib / wie hie der liebe Job saget / Ich werde
Gott anschawen mit meinem fleisch bekleidet/das ist/eben
den Leib/den er im Leibe Marie an sich genommen / der da
gelidden/ gestorben / aus dem Grabe erstanden ist / den
werde ich sehen sitzen zur Rechten meines Himlischen
Vaters / als ein fleisch von meinem fleisch / vnd ein ge-
bein von meinem Gebein / wie in auch der liebe Stepha-
nus bey seinem leben gesehen / Acto. 7. Ja sie werden an-
schawen die ewige göttliche Maiestet/ Gott Vater/Son
vnd heiligen Geist/ Den nach dem wir izt Gott in diesem
leben durch einen Spiegel in einem tunceln wort sehen
vnd erkennen / 1. Corinth. 13. werden wir in dore von
Angesicht zu Angesicht schawen/wie er ist/ 1. Johan. 3.
Ja wir werden nicht nur ein blicklin oder etliches dauon
bekomen/wie Moses/Elias/vnd die Jünger des HERN
auff dem Berg Thabor / das angesicht des HERN
Christi sahen / Sondern wir werden in ewiger herrlicher
beywohnung/ in ewiger Freundschaft vnd Brüderschaft
bey Gott fur vnd fur sein vnd bleiben/ vnd als ewige
Himlische Bürger im Paradis Gottes ewig leben / vnd
in ewigkeit von Gott nicht geschieden werden / Wie das
uon mit gar schönen worten saget der heilige Augustinus.
Epistola 6. de morte. Ipse erit finis desideriorum nos-

strorum, qui sine fine videbitur, sine fastidio amabitur,
& sine fatigatione laudabitur, Hoc munus, hic affectus,
hic actus procul dubio erit omnibus, Sicut vita æterna
communis. Das ist/aller herten begirden/wird auff den
gerichtet sein/welchen sie ewig sehē/ on allen vberdrus lie-
ben / on auffhören loben werden/das wird aller in gemein
ir sinn / ir werck vnd Ampt sein / gleich wie inen auch das
ewige Leben gemein ist/ Cyprianus de ciuitate Dei, Lib.
22. Vber das/das er von der zukünfftigen gemeinschafft/
welche die auserwelten mit einander in Gott haben wer-
den / herrlich leret / vermanet er auch vns alle / das wir
vns nach derselben sehnen / vnd dahin verlangen haben/
vnd eilen sollen. Patriam nostram Paradisum compuz-
temus: parentes Patriarchas iam habere cœpimus: quid
non properamus, & currimus, vt patriam nostram vi-
dere, vt parentes salutare possimus? Magnus nos illic
charorum numerus expectat parentum, fratrum, filio-
rum, frequens nos & copiosa turba desiderat, iam de sua
incolumitate secura, adhuc de nostra salute sollicita. Ad
horum conspectum, & complexum venire, quanta &
illis & nobis in commune læticia est. Das ist / last vns
das Himlische Paradis für vnser Vaterland halten/vnd
die heiligen Patriarchen für vnser Väter/ Warumb wol-
len wir aber nu nicht eilen / vnd lauffen vnser Vater-
land zubesichtigen? Vnd vnser Väter zu grüssen? Ach
wie eine grosse anzahl vnserer lieben Gros Eltern vnd
Brüder / wie eine grosse menge der lieben Kinder / die
schon des ewigen Lebens gewis sind / vnd sich vmb vnser
Seelen heil vnd Seligkeit bekümmern/warten auff vns/
frewen sich mit vns zu ergehen/ zu vereinigen vnd bekand
zu machen. S. Bernhardus schreibet auch sein dauon/
mit

mit diesen Worten: Tripliciter in æterna illa & perfecta
 beatitudine fruemur DEO: Videntes eum in omni-
 bus creaturis: habentes eum in nobis ipsis: & quod his
 omnibus ineffabiliter iucundius est, & beatius, ipsam
 quoque cognoscentes in semetipsa Trinitatem. Dreier-
 ley weise werden wir unsers Herrn Gottes in der ewigen
 Seligkeit genieffen. Erstlich das wir in allen seinen
 Creaturen werden erkennen. Zum andern / das wir in
 auch in uns werden wonende haben. Zum dritten / das
 das lieblichste sein wird / werden wir auch die heilige Drey-
 faltigkeit in jr selber erkennen. Vnd in summa / so wer-
 den wir als Kinder vnd erben Gottes / einnemen / inne
 haben / vnd besitzen das ewige Himmelreich / vnd als
 unser Eigenthum zur ewigen Freude genieffen vnd ge-
 brauchen / Denn da wird in uns leuchten vnd scheinen /
 Christus Ihesus die Sonne der Gerechtigkeit / Malach.
 4. Vñ der Morgenstern wird in unsern Herzen auffgehen /
 2. Pet. 1. Da wird Gott sein alles in allen / alles erfüllen
 mit seinem Liecht / vnd wird uns mit theilen / Gerechtig-
 keit / ewiges Leben / vnd die ewige Seligkeit / wird mit uns
 umbgehen / vnd reden wie ein gut freund oder Bruder mit
 dem andern. Kürzlich wird da solche freude sein / die hie
 bevor kein Auge gesehen / kein Ohre gehört / auch in keines
 Menschen Herz komen ist / welche Gott bereit hat denen
 die in lieben / da werden wir nicht lernen wie hie / Esa. 54.
 sondern alle von Gott geleret sein / vnd werden alle Gott
 anschawen vom kleinsten bis zum größten / Jerem. 13.
 Ja wir werden die ewige Göttliche Maiestet vnd unsern
 Erlöser nicht allein ewig anschawen / Sondern er wird
 uns auch mit seinen freundlichen / frölichen vnd holdseli-
 gen augen erquickten vnd von Herzen frölich machen / wel-

che freude in Ewigkeit von vns nicht kan noch sol genos-
men werden. Von welcher freude der Königliche Pro-
phet David im 16. Psalm also saget / Für dir ist freude die
fülle / vnd ein liebliches wesen zu deiner Rechten ewiglich.
Psal. 21. Du erfrestest mich mit freuden deines Andliss.
Vnd wie die Jünger des HERRN Ihesu von herzen sind
fro worden / da sie ihren Meister vnd HERRN / nach seiner
Siegreichen aufferstehung wider gesehen / vnd ist keine
lieblicher zeit jemals gewest / denn da der Herr 40. tage nach
seiner vrsend auff Erden gewandelt: Also werden wir
auch an solchem seinem anschawen ewige vñ vnuergängli-
che lust / freude / wonne / leben vnd seligkeit haben. Ah wie
dünckts einem armen Man oder Gesellen so gut / wenn
in ein Fürst oder hoher Potentat freundlich anseheth vnd
anlachtet / wie frolocket / wie ist er so guter ding drüber / er
weis für grosser freude nicht / was er bald thun sol / wie viel
tausent mal grösser freude wird das sein allen lieben gleu-
bigen / wenn der HERR aller HERRN / vnd König
aller Könige / sichtbarlich bey ihnen wonen / mit ihnen reden /
vnd sie freundlich anlachen wird? Das sollen wir nicht
allein wissen / sondern auch für vnser Person / vnd in vn-
sern herzen vns des trösten.

WZe nu der liebe Job diesen herrlichen Artikel
von der Auferstehung vnser fleisches / klarheit / herrlig-
keit / vnd anschawen Gottes / im ewigen Leben / festiglich
vnd von ganzem herzen gegleubet / vnd sich des selbigen
wider den schrecklichen / vnd grewlichen anblick des Todes
getröstet / vnd nu herrliches sehnen vnd verlangen nach
solcher frölichen auferstehung gehabt / wie er saget / Ich
werde mit dieser meiner Haut vmbgeben werden / vnd mit
meinen

meinen augen Gott schawen/Als wolt er sagen: All mein
lust / wunsch vnd begir ist / das ich meinen Erlöser mit
meinen augen anschawen möcht / vnd ich wancke noch
zweuel ganz vnd gar nichts dran / Sondern ich frewe
mich von ganzem herzen auff diesen frölichen tag / vnd
tröste mich damit in meinem höchsten elend/da aller jam-
mer ein ende nemen / vñ ein ewiger rugetag vñ erquickung
erfolgen wird / da ich alle meines elendes / vnd vnglücks
reichlich werde ergetet / vnd mir von dem Son Gottes
Ihesu Christo alle meine threnen von meinen augen ab-
gewischet werden: Also sollen auch wir alle an den Son
Gottes Ihesum Christum gleuben/vnd seines verdiensts/
Leidens vnd sterbens von herzen vns frewen vnd trösten/
vnd diesen Artikel von der Auferstichung vnsers Leibes
herrligkeit vnd klarheit im ewigen Leben / wol einbilden/
vnd ins hertz fassen / wider die Sünde / Tod / Teufel/vnd
alle anfechtung Geistlich oder Leiblich / vnd sonderlich
wider das schrecken / vnd grewlichen anblick des Todes
vns damit trösten vnd auffrichten / das wir fest / vnd von
ganzem herzen gleuben/vnd sagen/Wolan/ob wir gleich
mancherley Creuz vnd elend vnterworffen sein/ Leib vnd
Seel von einander scheiden/ vnd dieser elende / sündhaff-
tige Leib in die Erden verscharret/ verfaulet/ vermordert/
vnd von den Würmen verzeret/vnd zu nicht werden mus:
So glaube vnd weis ich doch gewis/ das mein HErr vnd
erlöser Ihesus Christus am Jüngstentage alle meine beins-
lin vnd steublin wird zusammen bringen / mit der Seelen
vnzertrenlich vereinigen / einen neuen / Geistlichen vnd
Himlischen Leib daraus erbawen / vnd zu sich nemen in
den Himel / da wir in schawen / mit im ombgehen vnd re-
den / vnd vnser Hertz wird sich frewen / vnd diese freude
sol

sol in ewigkeit von vns niche genomen werden / Sollen
derwegen mit frölichem herzen / wie denn auch diese ent-
schlaffene frome Fürstin gethan / singen / mit dem lieben
Simeon / **HERR** / nu lessstu deinen Diener im friede
faren / wie du gesagt hast / Denn meine augen haben dei-
nen Heiland gesehen / welchen du bereitet hast / fur allen
Völkern / Ein Liecht zu erleuchten die Heiden / vnd zum
preis deines Volcks Israel. Ach lieber Gott / Ich wil
von herzen gerne sterben / denn ich habe meinen Heiland
vnd Erlöser Christum Ihesum mit den augen meines
herzens gesehen vnd erkand / an den ich glaube / auff den
ich trawe vnd bawe / vmb des willen ich bekomme vnd habe
einen gnedigen Gott / Gerechtigkeit / ewiges Leben vnd
die ewige Seligkeit. Welcher Mensch nu also in diesem
Artickel fest gegründet ist / der kan vom Tode zum Leben
ritterlich durch dringen / Sollen wir aber solcher herrlis-
chen Auferstehung teilhafftig werden / vnd zur ewigen
freude / glori vnd herrligkeit eingehen / so müssen wir erst-
lich Geistlicher weise auferstehen / Rom. 6. Welches auff
diese weise geschicht / Nemlichen / das wir erstlichen unsere
Sünde erkennen / vns dieselbigen von herzen lassen leid
sein / vmb verzeihung derselbigen bitten / vnd glauben ge-
wislich / das vns Gott gnedig sein wolle / allein vmb sei-
nes geliebten Sons Ihesu Christi willen / der vns
von Gott gemacht ist / zur Weisheit / Gerechtigkeit /
Heiligung / vnd zur Erlösung / 1. Corinth. 1. Vnd das
wir denselbigen trewen Heiland / in vnser letzten stunde
mit gleubigen herzen anruffen / im unsere Seelen befeh-
len / als dem trewen Hirten vnd Bischoff / der sie thewer
erkauft hat / nicht mit Gold oder Silber / sondern durch
sein heiliges / thewres / Rosin farbes / vnschuldiges Blut /
so er

so er am Stam des heiligen Creukes für vns vergossen/
Das heist recht im HERN entschlaffen / Apoc. 14.
Vnd wer also feret/der feret wol/ vnd sol mit Christo zur
ewigen Freude vnd Herrligkeit gefurt werden / so gewis
Christus selbs im ewigen Leben ist. Denn also sagt Pau-
lus 1. Thess. 4. Wir wollen euch aber / lieben Brüder/
nicht verhalten von denen die da schlaffen / Auff das ir
nicht trawrig seid/ wie die andern / die keine hoffnung ha-
ben. Denn so wir gleuben / das Ihesus gestorben vnd
aufferstanden ist/ Also wird Gott auch / die da entschlaf-
fen sind durch Ihesum/mit sich führen.

Denn das sagen wir euch / als ein wort des HE-
ERN/ das wir/ die wir leben vnd vberbleiben in der Zu-
kunfft des HERN / werden denen nicht vorkomen die
da schlaffen/denn er selbs der HERN wird mit einem
Feldgeschrey vnd stimme des ErzEngels / vnd mit der
Posaunen Gottes ernidder komen vom Himmel / vnd die
Todten in Christo werden aufferstehen zu erst / Darnach
wir / die wir leben vnd vberbleiben / werden zugleich mit
denselbigen hin geruckt werden in den Wolcken / dem
HERN entgegen in der Luft / vnd werden also bey
dem HERN sein alle zeit / So tröstet euch mit diesen
worten vnter einander. Da werden wir Gott in ewigkeit
lob vnd preis sagen / vnd mit den heiligen Engeln das
schöne Gloria in excelsis Deo; Item Sanctus, Sanctus
Sanctus Dominus Zebaoth. Item, Das schöne Te De-
um laudamus singen/vnd on vnterlas Gott den Vater/
Son vnd heiligen Geist loben / vnd preisen: Gott den
Vater werden wir lobē/das er aus grosser vnermeslichen/
vnaussprechlichen liebe vnd barmherzigkeit gegen vns/
E seines

seines einigen Sons nicht verschonet / sondern denselbi-
gen für vns (auch dazumal da wir seine Feinde waren)
lassen leiden vnd sterben / auff das wir durch in mit Gott
dem Vater widerumb versünnet würden. Den Son Got-
tes Ihesum Christum werden wir loben vnd preisen / das
er aus grosser Liebe gegen vns / vom Himmel herab zu vns
armen Menschen in diesen jamerthal komen ist / vnd ob er
gleich ist gewesen in pöttlicher gestalt / hat ers doch für kein
raub geachtet / Gott gleich zu sein / sondern hat Knechts ge-
stalt angenommen / ist seinem Vater gehorsam worden / bis
in Tod / ja in Tod des Creuzes / auff das wir vom ewigen
Tode erlöset / ewiglich bey im sein vnd bleiben solten. Gott
den heiligen Geist werden wir preisen / das er für vnd für
bey vns gewesen / vns im rechten glauben bis an vnser letz-
tes ende erhalten / auff das wir durch den Tod haben kön-
nen durchdringen / vnd das ende vnser glaubens / welches
ist des Leibs vnd der Seelen heil vnd seligkeit / 1. Pet. 1.
erlangen. Da werden wir wider komen zu vnsern Kin-
dern / Eltern vnd guten Freunden / welche vns allhie auff
dieser Welt lieb gewesen / vnd mit in zugleich / Gott die
heilige Dreyfaltigkeit von angesicht zu angesicht anschau-
wen / vnd für vnd für / vnd in alle ewige Ewigkeit lob vnd
preis sagen / vnd singen mit dem lieben Paulo / 1. Corin.
15. Der Tod ist verschlungen im Sieg / da wird nach
der Marterwochen vnd Carfreitage folgen / der fröliche
Ostertag / vnd wird angehen die Freude / die da ewig sol
weren / welche auch in ewigkeit von vns nicht kan noch sol
genommen werde. Sehet dieses sol also sein vnser einiger vnd
höchster trost / in allen vnsern nöten / ja an vnserm letzten
ende. Was kan vns der zeitliche Tod mehr thun / denn
das er vns zum besten diene / das wir deste ehe in Ihesu
su

In Christo entschlaffen / vnd mit J. H. E. su von Gote
zum ewigen Leben vnd Seligkeit eingefüret werden. Ah
wie selige vnd aber selige Leute weren wir / wenn wir sol-
chen trost recht schaffen fassen vnd glauben köndten etc.

Also habt jr sein gehöret wie sich Job des andern
Artickels vnsers Christlichen glaubens tröstet / in dem er
saget. Ich weis / Scio, certus sum, Ich bin des gewis vnd
zweuele daran lauter nichts / das mein Erlöser / mein Jhe-
sus / der sich selbs zur Erlösung für vns gegeben hat / 1.
Timoth. 2. nicht ein todter Heiland vnd Erlöser ist / son-
dern er lebet / vnd er lebet im nicht alleine / sondern mir vnd
allen gleubigen / Wie er Johan. 14. saget. Viuo & vos
viuetis, Ich lebe vnd jr solt leben. Er ist nicht allein Abra-
hams / Isaacs vnd Jacobs / sondern auch mein Erlöser /
der da lebet / darumb achte ich not vnd Tod nichts.

Zum andern / tröstet sich auch Job mit dem drit-
ten Artickel vnsers glaubens von aufferstehung des flei-
sches / wie alles an vns wider aufferstehen sol. Denn erst-
lich sehet er die ganze Person. 1. Er wird mich auffer-
wecken. 2. Darnach die durchlöcherte Haut / die isund-
schadhaftig ist / vnd hernach von den Würmen sol verz-
zeret werden / diese Haut sol ich auch wider bekommen.
3. Zum dritten / gedencet er seines fleisches / ob es gleich
verweset vnd vermodert / so werde es im doch sein Er-
löser in grosser klarheit wider zustellen / vnd in damit be-
kliden. 4. Zum vierden gedencet er auch seiner augen /
ob die im Tode brechen / vertunckelt werden / vnd nichts
mehr sehen können / so werde im sein Erlöser span neue
augen geben / damit er seinen Heiland wird können erkens-
nen.

nen. Das heist recht die aufferstehung vnsers fleisches/
rund vnd artig beschriben / das auch kein beinlin noch
steublin / von vnsern Cörpern sol dahinden bleiben / wie
auch Ezechiel der Propghet 37. Cap. solchs fein beschreibet/
vnd Prudentius in seinem Carmine singet / Veniant
modo tempora iusta, Cum spem Deus impleat omnem,
Reddas patefacta necesse est, Qualem tibi trado figuram,
Welche wort der Ehrwürdige / Achtbar vnd wolge-
larte Herr M. Georgius Listenius / also in diesem Lied-
lin deudsch gegeben. So bald nu die zeit herzu nahet/
Vnd die ewig freude sich anfahet / Mus sich die Erd auff-
thun / vnd eben / Diesen Leichnam vns wider geben.

II. Nu wollen wir zum andern / von der Gottseligen
Fürstin / Christlichem leben vnd sterben etwas sagen. Vnd
ist / dis stück belangend / menniglichem bewust / das ire F. G.
von jugend auff / von dem Durchleuchtigsten Hochge-
bornen Fürsten vnd Herrn / Herrn Heinrichen Herzo-
gen zu Sachsen / Landgrauen in Thüringen / Marggra-
uen zu Meissen etc. irer F. G. geliebten Herrn Vater /
Hochlöblicher vnd seliger gedechtnis / in reiner Göttli-
cher Lutherischer Lere / vnd allen Gottseligen Fürstlichen
tugenden auffgezogen worden. Vnd als hernach ire F.
G. zum heiligen Ehestande komen / darin sie Gottselig-
lich vnd ganz Tugentreich gelebet / vnd iren Herrn vnd
Gemahl mit rechter / Ehelicher trew gemeinet / ist sie als
eine Gottselige vnd Christliche Fürstin / wie denn das
Gericht am Hause des HERRN pfleget anzufahen / in
irem Ehelichen leben mit mancherley Creuz vnd Trüb-
sal heimgesucht: Vnd endlich von irem Herrn vnd Ge-
mahl verlassen / vnd sehr betrübet worden / hat sich aber als
lezeit

lezeit in Gottes furcht / mit Christlichem leben vnd wandel Fürstlich vnd Erbarlich verhalten / vnd alle ires Ehegemahls vnrechte vnd vbermessige gewalt / damit er sie beleet / mit grosser gedult vnd gewisser hoffnung der endlichen erlösung / getragen vnd vberwunden / Auch wie der Son Gottes Ihesus Christus selbs gethan / vor alle ires F. G. feinde / sonderlich aber für iren lieben Herrn vnd Ehegemahl oft vnd vielmals mit heissen threnen vnd seuffzen gebeten / Gott der HERR wolle im alle seine Sünde vergeben / vnd in Beterlichen vnd gnediglichen erleuchten / das er sich bekeren vnd ewig selig werden müge. Vnd nach dem der vnruhige / boshafftige Ehetuefel / durch Gottlose Lestemeuler nicht gefeiret noch geruhet / hat ire F. G. zu Gott dem HERRN tag vnd nacht geruffen / er wolle sich ires F. G. züchtigen herzens annehmen / zum rechten sehen / vnd ihre Vnschuld an tag bringen / welches denn auch der gestalt geschehen / das alle Lestemeuler vnd Verleumbder vber ires F. G. vnschuld zu schanden worden / Denn der keusche Gott nimpt sich oft wunderbarlich züchtiger herzen an / wie er auch bey den Heiden Frawen Zucht vnd vnschuld mit dem glüenden Eisen / so die verleumbdeten in Tragedien zu tragen pflegten / bezeugen liesse / Vnd erwecket Daniel den Knaben / der errettet durch seine Göttliche weisheit die züchtige Susannam / vñ bracht die alten Buben in die Gruben / die sie der fromen Frawen gegraben hatten. Fraw Königundis Keiser Heinrichs Gemahl / kam auch auff anstiftung vnd böse list des vnsaubern Sathans in verdacht ires Ehrenhalben / aber da sie on vorlezung mit blossen füßen auff glüenden Pflugscharen gieng / beweisset sie ire Christliche vnd Adelige zucht vnd reinigkeit /

E. iij

Richars

Richardis die frome Keiserin Caroli Crassi Gemahl/
wird auch verdacht vnd beschuldigt von irem vnuormü-
glichen Herrn / aber sie füret ire Sache mit guten ehren
hinaus / vnd erbeit sich auch auff glühenden Eisen zu ge-
hen / wie sie auch von irem Herrn sich wireket vnd wird
eine Klosterfraw . Gott straffet aber ires Herrn leichtfer-
tigen glauben / vnd stößt in vom Keiserlichen Stuel/
wie die Historien bezeuget.

O Jeser keusche Gott / hat auch vnserer Hochge-
bornen Fürstin Ehre vnd Zucht errettet / vnd alle falsche
Beschuldigung mit der Wahrheit ausführlichen widerles-
get vnd gedempffet.

Dafür jr F. G. Gott dem HErrn von herzen gedank-
et / vnd eben den tag da sich ire F. G. krank befunden /
mit solchen Worten angefangen : Ich dancke dir HERR
Gott / das du mein vnschuld ans liecht gebracht / heute dies-
en tag ist es ein jar / da meine vnschuld an tag komen / Ich
habe dich HERR drum gebeten / du hast mich auch gne-
diglich erhöret / bin nu bereitet / wenn du HERR wilt /
von dieser Welt gerne abzuscheyden . Ich bin auch war-
hafftig berichtet / das Hochgedachte vnser gnedige Für-
stin / kurz vor irem seligen Abschied begeret hab iren
Erwring mit sich in ir Grab zu nemen . Denn weil sie
von Herzog Erich von Braunschweig / irem Gemahl
falschlich gerüget vnd beschuldiget worden / als hette sie
im den Erwring / in irem Ehestande wider zustellen las-
sen / wolte ire F. G. solch Ehepfand / welchs sie vnuor-
ruet behalten / mit sich in ir Ruhbetlin / an irem keuschen
Leibe tragen / vnd am Jüngsten tage für dem Richtstuel
Jhesu

Ihesu Christi damit öffentlich bezeugen/das sie von irem
Gemahl / zur vnbilligkeit were beschweret worden/ Dar-
auff ist irer F. G. der Drauring an Hals gehenckt / vnd
mit irer F. G. Leib ins Grab geleget worden. So viel von
irer F. G. Gottseligem vnd Christlichem wandel vnd les-
ben.

W wollen wir auch kürzlichen etwas vermelden
von dem Gottseligen vnd Christlichen irer F. G.
Hochlöblicher vnd Christlicher gedechtnis/ Abschied aus
diesem Leben/ dazu sie sich also bereitet.

I. Dze Mittwoch fur dem Christag den 21. Decemb.
hat ire F. G. sich etwas schwach befunden.

II. Den 24. Decemb. Welcher ist gewesen der Chris-
tag/hat ire F. G. mit irem Frauenzimmer gebeichtet/vnd
folgend den andern tag/Nemlichen den tag S. Stepha-
ni/das Hochwürdige Sacrament des HErrn / mit irem
Frauenzimmer vnd ganzem Hoffgesinde/ in der Stifte
Kirche/in grosser versammlung vieler Christen empfangen.
Vnter der Predigt aber ist ire F. G. sehr schwach wor-
den/wie denn ire F. G. selbs bekant/ sie hette nicht anders
gemeinet / sie würde in der Kirchen bleiben müssen/hette
aber den lieben Gott gebeten / er wolte ire F. G. nur so
lange erhalten/das sie den waren Leib vnd das ware Blut
Ihesu Christi empfangen mochte. Nach gehaltener Predigt
aber/da ire F. G. zum Abendmal hat gehen wollen/ist ire
F. G. so starck worden (wie ire F. G. selbs bekand) als
were ir zuvor nichts gewesen. Da aber ire F. G. den wa-
ren Leib vnd Blut Ihesu Christi empfangen/vnd wider-
umb in ir Gemach hat gehen wollen / ist sie abermal so
schwach wordē/das sie die Treppen nicht hat hinan gehen
können/vnd gesaget zu irem Herrn Secretario. Ich Len-
hart

hart reiche mir deine Hand her / wie bin ich so schwach /
vnd da er ire F. G. in jr Gemach gebracht / hat ire F. G.
zu ihm gesagt: Nu dancke ich meinem lieben Gott / das ich
noch das Abendmal des HErrn empfangen / denn ich
ward so schwach in der Kirchen / das ich nicht anders mei-
nete / vnser lieber Gott würde komen / vnd mich von dies-
ser Welt abfoddern. Darauff der Herr Secretarius zu
irer F. G. gesaget / Da sich ewre F. G. so schwach be-
funden / hette sie doch jr das Abendmal des HErrn wol in
irem Gemach reichen lassen können / Da hat ire F. G. im
geantwortet. Nein Lenhard / Ich habe noch fur meinem
lesten Ende / meinen glauben an den HErrn Ihesum
Christum / fur Gottes / vnd der ganzen Kirchen augen
allhie bekennen wollen.

Wie aber ire F. G. sich gefület / das sie der All-
mechtige Gott von dieser Welt hat fordern wollen / hat
ire F. G. sich also dazu geschicket.

Christlichen hat ire F. G. jr Testament geordnet /
wie mans nach irem tode verhalten solle / welches gesche-
hen den 1. Januarij dieses 75. Jars. Nach diesem hat
ire F. G. sich keiner Weltlichen hendel mehr angenommen /
sondern sich zu einem seligen Abschied bereitet. Wie sie
denn mir als irem unwirdigen Beichtvater einen Boten
geschickt / vnd Gnedigst begeret / das ich zu irer F. G. kom-
men / Denn sie mit mir gerne aus Gottes Wort reden
wolte / Da ich nit zu irer F. G. in jr Gemach komen / wel-
ches auch geschehen den 1. Januarij umb 3. Uhr auff
den Abend / hat ire F. G. zu irem Frawzimmer vnd zu mir
gesagt. Ir Jungfrauen vnd jr Herr Magister / das be-
ger ich Gnedigst von euch / das jr mir solches nach mei-
nem

nem tode wollet zeugnis geben / das dieses mein letztes be-
kentnis gewesen sey / Nemblichen / Ich wil sterben auff das
einige hohe Verdienst / bitter Leiden vnd sterben vnser
HERRN Ihesu Christi / vnd glaube gewislich / das mich
mein Erlöser vnd Seligmacher Ihesus Christus der
Son Gottes / am Jüngsten tage aus dem staube der Er-
den wird wider aufferwecken / da ich widerumb zu alle den
meinen / denen ich durch den zeitlichen Tod entzogen / kom-
men / vnd mit inen in ewiger glori vnd Herrligkeit leben
werde. Vnd da ich (sagt ire F. G.) solches mit meinem
Munde nicht mehr bekennen kan / so foddert ein zeichen
von mir / auff das ir sehen / vnd solches hernachmals nach
meinem tode bezeugen können / das ich bis auff mein letz-
ten seuffzer auff solchem bekentnis beruhet bin.

Nach solchem irem Christlichem vnd Gottseli-
gem bekentnis / habe ich mit irer F. G. aus Gottes Wort
geredet / vnd sie damit getröstet / welches sie mit grosser
begir vnd lust hat angenommen / Vnd da ich von irer F. G.
habe widerumb weg gehen wollen / hat ire F. G. gnedigst
von mir begeret / das ich ire F. G. mir in meinem Christ-
lichem Gebet wolte lassen beuohlen sein.

Den andern tag des Januarij bin ich widerumb
zu irer F. G. komen / sie erinnert ires bekentnis / vnd ge-
fraget / ob ire F. G. noch beruhete auff dem bitter Leiden
vnd sterben Ihesu Christi / auch glaubete / da sie Gott der
HERR durch den zeitlichen Tod von dieser Welt ab-
fordern würde / das der HERR Ihesus Christus ire F. G.
am Jüngsten tage aus der Erden zum ewigen Leben auff-
erwecken würde? Antwortet sie mir / Ah ja lieber Herr
S
Magister /

Magister / das ist mein trost fur vnd fur in meinem lang-
werenden Creuz vnd Trübsal gewesen / damit ich alles
Creuz vnd vngedult vberwunden / das ich mich der fröli-
chen Auferstehung / vnd der zukünfftigen Freude vnd
Herrlichkeit getröstet. Darauff ich irer F. G. furgesaget
den Spruch des lieben Jobs / Ich weis das mein Erlöser
lebet etc. Vnd irer F. G. daraus furgehalten / wes sich der
liebe Job in seinem höchsten Creuz vnd elend getröstet /
vnd was sich ire F. G. in irem Creuz vnd franckheit /
welches der trewe / gnedige vnd barmherzige Gott irer F.
G. aufferleget / trösten solle / welches irer F. G. so herzli-
chen wolgefallen / das sie gnedigst begeret / ich solte irer
F. G. solchen Spruch oft vnd vielmals fursagen / damit
ire F. G. sich der auferstehung des fleisches / vnd der zu-
künfftigen Freude vnd Herrlichkeit erinnern möcht.

Den dritten tag Januarij bin ich widerumb früe
vmb 6. Uhr zu irer F. G. gefordert worden / da ich gar
eine schwache Fürstin doch Christlicher andacht vnd gu-
ter vernunft befunden. Da habe ich ire F. G. angeredet /
vnd sie gefraget / ob ir F. G. irem lieben Gott auch willig
vnd gerne als ein gehorsames Kind folgen / wenn er kome /
vnd ire F. G. von dieser Welt abfordern wolle. Antwort-
tet sie mir ? Ah ja lieber Herr Magister / ich habe die gan-
ze nacht meinen lieben Gott angeruffen / vnd vmb ein
seliges stündlin gebeten / hoffe auch er wird nicht lange
aussen sein / ob er gleich eine kleine weile verzeuget / so wird
er doch komen vnd mir helffen. Darauff ich zu irer F.
G. gesaget / das solte sie gewislich glauben / er würde ko-
men vnd nicht aussen bleiben / Vnd hab ir aus dem tröstli-
chen Lobgesang / Aus tieffer not ich ruff zu dir / fur gesa-
get /

get diesen Vers / Vnd ob es wert bis in die nacht / vnd
wider an den morgen / Doch sol mein Herz an Gottes
macht / verzweiheln nicht noch sorgen etc. Ja antwortet
sie mir / vnd saget / Ah ja Herr ich hoffe auff in / kom/
kom du Herr Ihesu Christe / vnd eile mir zu helfen.
Solche sehnliche seuffzer hat ire F. G. den ganzen tag
vber bis auff den abend vmb 5. Uhr getrieben / da hat ir
F. G. angefangen zu schlaffen / vnd hat solcher schlaff
mit irer F. G. geweret bis auff den andern tag vmb 12.
Uhr zu mittage. Ist aber bisweilen im schlaff auffge-
faren / vnd gesaget / Ah du mein Herr Ihesu Christe/
kom vnd erlöse mich / auch vnter andern worten / hat sie
dieser sich hören lassen / Ist der Zimmern Sack fertig /
damit zuuerstehen geben wollen / das der Allmechtige Gott
bald komen vnd ire F. G. erlösen würde.

Den 4. Januarij ist ire F. G. vom schlaff wi-
derumb erwacht vmb 12. Uhr / da fraget ich ire F. G. ob
der liebe Gott schier komen / vnd ire F. G. zu sich in das
ewige Leben nemen würde? Antwortet sie mir: Ah ja/ja/
er wird nicht lange aussen sein / Da hab ich irer F. G.
fur gebetet / den Spruch Joh. 3. Also hat Gott die Welt
geliebet etc. Item / das schöne Gebetlin Herrn Eberi / Herr
Ihesu Christ war Mensch vnd Gott etc. Welchen
Spruch vnd Gebetlin ire F. G. mit herz vnd mund nach
gesprochen / So bald aber solches geschehen / saget sie / Ah
nu nu mein Herr Ihesu kom vnd erlöse mich / Ah bleibe
nicht lange aussen / Ah Herr Ihesu Christe / der du allein
in der todes not helfen kanst / hilff vnd erlöse mich / nimm
meine arme Seele in deinen Schos / welche du mit deis-
nem Blut vnd Tod erlöset hast. Darauff sie eine viertel
stunde

stunde geruhet / vnd abermal angefangen vnd gesaget /
Ah Ihesu Christe du Lemblin Gottes / erbarm dich vber
mich / dein armes Kind / vnd erlöse mich / ich wil dir gerne
folgen. Da hab ich irer F. G. fürgesaget / sie vermanet /
sie solte Gott als ein gehorsames Kind in irer Franckheit
geduldig aushalten / es würde der trewe Gott zu rechter
zeit komen / vnd nicht aussen bleiben / jr auch für gesaget
den Spruch des Propheten Esaie 49. Cap. Kan auch
eine Mutter irer Kindes vergessen / das sie sich nicht er-
barme vber den Son irer hertzens / vnd ob sie gleich dessel-
ben vergesse / so wil ich doch dein nicht vergessen / Denn
ich habe dich in meine Hand gezeichnet. Da sagete ire F.
G. zu mir / Ah ja es ist ja war / Gott ist vnmöglich das er
meiner vergessen solte. Mit diesen vnd dergleichen wort-
ten habe ich ire F. G. getröstet bis vmb 2. Uhr nach
Mittage / Dazu als denn komen ist der Ehrwürdige /
Achtbar vnd Wolgelarte Herr M. Augustinus Jonas
Pfarherr vnd Superintendens allhier / vnd hat ire F. G.
in Gottes Wort getröstet / welchem sie mit aller begir zu
gehöret / vnd was er ire F. G. gefraget / mit nein vnd ja
beantwortet / Auch lezlichen eine halbe stunde für irem
Abscheid / habe ich ire F. G. gefraget / ob sie noch beruhe
auff dem verdienst Ihesu Christi / hat sie mit dem Heubt
gewincket / vnd also ein Zeichen irer glaubens von jr ge-
ben. Drauff als bald irer F. G. die Sprach entfal-
len. Wie wir aber gesehen das sie nicht mehr hören konte
(welches eine halbe viertel stunde für irem Abscheid ge-
schehen) ob man jr gleich in die Ohren schrie / sind wir
alle mit einander / so viel vnser bey irer F. G. gewesen / auff
vnser Knie nider gefallen / vnd Gott angeruffen / das er
irer F. G. ein seliges vnd ruhiges stündlin bescheren.
Welches

Welches Gebet der trewe Gott erhöret/ vnd ire F. G. so
sanfft ein schlaffen lassen / das sie nicht der geringsten
Gliedmassen eines gereget/sondern nur zwey seuffzerlein
gethan/vnd also umb 6. Uhr auff den Abend Christlich/
Gottselig / vnd friedlich verschieden. Vnd bezeuge fur
jedermenniglich / auch fur Gott / welches ich auch am
Jüngsten tage thun wil / das ire F. G. seliglich im HE-
rrn entschlaffen / vnd durch vnsern lieben HERRN
vnd Heiland Ihesum Christ/allbereit gefüret sey/was die
Seele betrifft/zur ewigen Seligkeit / vnd habe schon ent-
pfunden/vñ geschmeckt die freude des ewigen Lebens/also
das sie auch der ganzen Welt gut nicht neme / vñnd ein
wechsel mit vns hielte / da sie ist mit allen heiligen Pa-
triarchen/ Propheten/ Aposteln/ Merckern/ Ja mit vn-
sern lieben HERRN Ihesu Christo selbs / ewig lebet / zu
welcher Seligkeit auch irer F. G. Hochlicher vnd Christ-
licher gedechtnis Leib / den wir ist in die Erde zur ruge le-
gen werden/am Jüngstentage wird aufferwecket werden/
vnd Leib vnd Seel also wider zusammen fomen/vnd ewig
bey Gott sein vnd bleiben.

Dzses habe ich auff dissmal bey der Leiche der
Durchleuchtigen Hochgeborenen Fürstin vnd Frawen/
Frawen Sidonia geborne Herzogin zu Sachsen / Herz-
ogin zu Braunschweig vnd Lüneburg / Hochlöblicher
vnd Christlicher Gedechtnis/sagen wollen/ vnd bitte den
Vater aller gnaden vnd barmherzigkeit / er wolle irer F.
G. vnd vns allen eine fröliche Auferstehung verleihen/
vnd vns ja bald zusammen bringen. Mittler weil aber vn-
sern gnedigsten Churfürsten vñnd Herrn / sampt seiner
Churfürstlichen Gnaden Gemahl Junge Herrschafft
I iij vnd

vnd Frewlin / welche ober dem Tödlichen abgang dieser
vnsrerer gnedigsten Fürstin / hoch betrübet sein / trösten/
vnd sie bey frischer/langwerender gesundheit/auch
steter/friedlicher/glückseliger Regie-
rung gnediglich erhalten/

A M E N.







78 L 1851


X2208310

K



Milenberg, 1575.





B.I.G.

Farbkarte #13

Eine Christliche

Leichpredigte / vber der Leich der
Durchleuchtigen Hochgeborenen Fürstin
vnd Fräwen/Fräwen Sidonien gebornen
Herzogin zu Sachsen / vnd Fürstin zu
Braunschweig vnd Lüneburg / ge-

than zu Freibergk in der
Thumkirchen.

*Georg Augusti Saxe-Weimariensis
Alfredi de Braunschweig
Lüneburgensis*

Durch M. Martinum Schemel
Predigern zu Weissenfels etc.



Gedruckt zu Wittenberg / durch
Johan. Schwertel,

1 5 7 5.

11
16

